

ЎЗБЕКИСТОН РЕСПУБЛИКАСИ ВАЗИРЛАР МАҲКАМАСИНИНГ
ҚАРОРИ**77****Фермер хўжаликлари тасарруфидаги ер участкалари майдонларини мақбуллаштириш якунлари тўғрисида**

Қишлоқ хўжалиги маҳсулотлари етиштиришни ташкил этишнинг асосий шакли сифатида фермер хўжаликлари фаолияти самарадорлигини янада ошириш, шунингдек ер, сув ва бошқа моддий-техника ресурсларидан оқилона фойдаланилишини таъминлаш, хўжаликларнинг молиявий аҳволини мустаҳкамлаш мақсадида Вазирлар Маҳкамаси **қарор қилади:**

1. Ўзбекистон Республикаси Президентининг «Фермер хўжаликлари тасарруфидаги ер участкалари майдонларини янада мақбуллаштириш чоратадбирлари тўғрисида» 2009 йил 22 октябрдаги Ф–3287-сон Фармойишини бажариш юзасидан Махсус комиссия томонидан Қорақалпоғистон Республикаси Вазирлар Кенгаши, вилоятлар ва туманлар ҳокимликлари билан биргаликда:

республика вилоятлари ва туманлари бўйича фермер хўжаликларининг ер участкалари майдонларини илгари ўтказилган мақбуллаштириш ва улар фаолиятининг иқтисодий самарадорлиги натижаларини таҳлил қилиш;

фермер хўжаликлари тасарруфидаги ер участкалари майдонларини хатловдан ўтказиш, улардан фойдаланишнинг самарадорлигини, шунингдек фермерларга ер участкалари беришнинг асосланганлигини, холислигини ва ошкоралигини ўрганиш;

фермер хўжаликларининг молиявий аҳволини, моддий-техникавий базаси, меҳнат ресурслари ва айланма маблағларининг мавжудлигини, шунингдек улардан оқилона ва самарали фойдаланилишини ўрганиш ишлари амалга оширилганлиги маълумот учун қабул қилинсин.

2. Фермер хўжаликлари тасарруфидаги ер участкалари майдонларини мақбуллаштириш масалалари бўйича Махсус комиссия томонидан ишлаб чиқилган:

Қорақалпоғистон Республикаси ва вилоятлар бўйича фермер хўжаликлари ер участкалари майдонларини мақбуллаштиришнинг йиғма якунлари 1 — 1д-иловаларга* мувофиқ;

Қорақалпоғистон Республикаси, вилоятлар ва туманлар бўйича фермер хўжаликлари ер участкалари майдонларини мақбуллаштириш якунларига кўра ер участкаларининг сони ва ўртача майдонлари 2 — 15-иловаларга* мувофиқ маъқуллансин.

3. Қорақалпоғистон Республикаси Вазирлар Кенгаши, вилоятлар ҳокимликлари ҳамда Ўзбекистон Республикаси Қишлоқ ва сув хўжалиги вазирлиги:

Ўзбекистон Республикаси Ер ресурслари, геодезия, картография ва дав-

* 1 — 15-иловалар берилмайди.

лат кадастри давлат қўмитаси, бошқа манфаатдор вазирликлар ва идоралар билан биргаликда — 2010 йил 25 мартгача бўлган муддатда йириклаштирилган фермер хўжаликлари билан ер участкаларини ижарага олиш, давлат эҳтиёжлари учун пахта хом ашёси ва бошоқли экинлар дони сотиш, шунингдек моддий-техника ресурслари сотиб олиш ҳамда хизмат кўрсатувчи тармоқлар корхоналари билан хизматлар кўрсатиш юзасидан шартномаларни қайтадан тузиш ишларини тугаллаш чора-тадбирларини кўрсинлар;

Ўзбекистон Республикаси Давлат солиқ қўмитаси ва Давлат статистика қўмитаси билан биргаликда тугатилган фермер хўжалиklarини юридик шахсларнинг давлат реестридан белгиланган тартибда чиқариш чора-тадбирларини кўрсинлар;

фермер хўжаликларига қишлоқ хўжалиги маҳсулотлари етиштириш учун минерал ўғитлар, ёнилғи-мойлаш материаллари ва бошқа моддий ресурслари сарфланишини тўлақонли ҳисобга олиш жорий этилиши ташкил қилинишини таъминласинлар.

4. Ўзбекистон Республикаси Қишлоқ ва сув хўжалиги вазирлиги:

Ўзбекистон Республикаси Олий ва ўрта махсус таълим вазирлиги, Ўзбекистон Фермер хўжаликлари уюшмаси билан биргаликда фермерлар малакасини оширишнинг мамлакатимиз минтақаларидаги тегишли олий таълим муассасаларида уларнинг бизнесни бошқариш ва юритиш асосларига тизимли ўқитишни назарда тутувчи дастурини бир ой муддатда тайёрласин ва тасдиқласин;

2010 йил 1 ноябргача 2011 — 2015 йилларда қишлоқ хўжалиги экинлари ўстиришнинг намунавий истиқболли технологик хариталарини минтақаларнинг тупроқ-иклим шароитларини ҳисобга олган ҳолда ишлаб чиқсин ва фермер хўжалиklarига етказсин.

5. «Ўзағромашсервис» уюшмаси, «Ўзнефтмаҳсулот» акциядорлик компанияси ва «Ўзкимёсаноат» давлат-акциядорлик компанияси Ўзбекистон Республикаси Қишлоқ ва сув хўжалиги вазирлиги билан биргаликда фермер хўжалиklarига тегишли равишда минерал ўғитлар, ёнилғи-мойлаш материаллари етказиб бериш ҳамда сервис хизматлари кўрсатиш ҳажмларини аниқлашда технологик хариталар бўйича моддий-техника ресурслари сарфлашнинг белгиланган нормативларига қатъий амал қилсинлар.

«Ўзпахтасаноат» уюшмаси, «Ўздонмаҳсулот» акциядорлик компанияси ўзларига қарашли ташкилотлар томонидан тузилган шартномаларга қатъий мувофиқ равишда фермер хўжаликлари билан пахта хом ашёси ва бошоқли экинлар дони учун ўз вақтида ҳисоб-китоб қилиниши юзасидан назоратни таъминласинлар.

6. Ўзбекистон Республикаси Адлия вазирлиги, Қишлоқ ва сув хўжалиги вазирлиги, Ўзбекистон Фермер хўжаликлари уюшмаси фермер хўжаликлари қонуний манфаатларининг ҳуқуқий жиҳатдан самарали ҳимоя қилинишини таъминласинлар, давлат органлари ва мансабдор шахслар томонидан уларнинг хўжалик фаолиятига ноқонуний аралашишга уринишларга қатъий барҳам берсинлар.

7. Ўзбекистон миллий телерадиокомпанияси, Ўзбекистон матбуот ва

ахборот агентлиги, Ўзбекистон Республикаси Қишлоқ ва сув хўжалиги вазирлиги телевидениеда ҳамда оммавий ахборот воситаларида фермер хўжалиқларининг ривожланиши ва фаолияти, қишлоқда ишлаб чиқариш инфраструктураси такомиллаштирилиши жараёнларини ёритиш бўйича махсус кўрсатувлар ва рукнлар ташкил этсинлар.

8. Мазкур қарорнинг бажарилишини назорат қилиш Ўзбекистон Республикаси Бош вазирининг биринчи ўринбосари Р.С. Азимов зиммасига юклансин.

**Ўзбекистон Республикасининг
Бош вазири**

Ш. МИРЗИЁЕВ

Тошкент ш.,
2010 йил 16 март,
47-сон